

皇明詞林人物考

皇明詞林人物考卷之八

楚麻城王兆雲元禎輯著

豫順陽李 蔭褶媼閱訂

沈舜臣

鳳峯沈公名愷字舜臣嘉靖己丑進士松江華亭人官楚藩參知高襟遠度政餘喜攻詩文忤朝貴遂托親老乞身歸居家杜門著書與物無競恂恂一儒生也初乏嗣後竟得子人以爲厚德之報年七十餘監司薦其賢公不爲意益懋

進脩槩公平生豈數數于世者公全集文旨尤
佳所著守株子論逢掖生多誦法之

吳純叔

吳之長洲舊有玉涵堂集集少叅吳公之作也
公名子孝字純叔嘉靖己丑進士嘗選翰林庶
吉士少穎異蚤登甲第又文端公白樓閣老子
也故與時不合竟爲權奸所厄以光祿寺丞出
補湖藩叅議提督太和山官亦竟止於是隆慶
十卯公既歿而集始出公髫時侍文端公燕指
傀儡中嬾人命賦之公應口曰裝成美婦人歌
舞盡堂春一笑清燈下元來不是真坐客絕倒

公之賴異此亦可槩見矣

呂山甫

呂君名高字山甫號江峯鎮江山在江上有峰而高名與字號因類取之幼從學於舅氏憲副鄔南涯己丑舉進士選授戶部主事卽爲堂卿儉菴梁公材所倚重劄管太倉弊端翦而公法不廢外而運官旗甲內而經歷倉攢無不仰賴之者已而改差淮南監視常盈倉事簡可得肆力讀書文事由此日工文名由此日起轉兵部武選司主事再陞車駕司郎中山東提學員缺

君以副使往司其事取士咸服其精不輕以法
假人務得真才署臬司篆吏畏民服積年訟獄
悉平文錄舊多出題學手君之時文精瑩簡當
葉御史經乃置而不用顧於二千里外求唐荆
川之作錄成君貽書所知曰錄中無僕一字不
敢冒他人之美其間紕繆處必爲禮部所叅駁
與趙甬江文華書中亦具此意不過簡札往來
常事耳嚴介谿嵩深恨葉御史彈劾假此報復
之摘其辭涉譏訕者以聞上因大怒械至御史

昔范臬之有職事者繫之獄罪謫各有等差而御史竟歿杖下臺中誤以爲君從吏之也甲辰外考楊虞坡博慮其不安言之冢宰許松臯贊如呂某者歷官行已俱無異議考察幸毋及之松臯應曰然已而不免豈非冤之又冤哉原以考滿離任過家省母已而陞行太僕罷官之命繼又下日酌酒賦詩遍遊金焦諸名勝十餘年極盡林泉之樂所著有湖南訓規所輯有校藝錄戡定三城錄江峯漫稿其大書亦古拙可觀

善別自古器物以其世世好古耳

皇甫子循

雲南按察僉事皇甫先生汭字子循百泉其別號也父曰重慶守錄先生兄弟四人皆有文彩冲不得志于公車以死孝廉與先生雖得第然其官不大顯而先生自工部郎外補不能其職改國子博士旋起爲南京吏部謫同知某州爲御史王言所捕亡命得解補開州超同知處州處遷雲南按察僉事大計中白簡歸處鄉復爲陳御史所窘家幾破先生性和易不設城府爲

詩文沾沾自喜好聲色工狎游而不能通知戶
外事以故數困然信心而行以文自娛于諸兄
弟中默壽考年八十乃卒其詩五言律最工七
言次之有錢劉風調文慕稱六朝

李伯華

靳子愚

李開先字伯華號中麓濟南之章丘人嘉靖己丑進士仕至太常少卿積書好客豪宕不羈著作甚富如貌貅縱橫江海泛溢一韻累百篇益白樂天之流也

靳學顏字子愚號兩城嘉靖乙未進士充之濟寧人官工部堂卿奇才崛起英姿穎發詩宗初唐文宗莊烈雄渾老健卓然成家邊之純殷之奇不能踰也

鄭端簡

公名曉號淡泉海鹽人由進士官至刑部尚書
謚端簡公生平凝重嚴肅以介特自持泊乎於
世味無所染蓋不媿其號與謚云其學無所不
窺而於國事尤稱該洽所著吾學編與太
史公史記朱文公綱目並傳不朽矣雷司空古
河序畧云太子少保淡泉鄭端簡公崑起鹽
官以博洽伏宇內心切識之及徼天幸與公同
在銓司每政暇彼此輒以所撰述相質見公所

編吾學總目叙自戊申年 太祖混一區夏握
符御極改元洪武歷永樂洪熙宣德正統景泰
天順成化弘治正德凡關係大政者倣朱子綱
目以歲係月各爲一記建文四年雖革除殘缺
亦搜集遺文折爲遜國記至於同姓諸王分封
列藩及開國靖難禦胡勦寇并戚畹佞幸列爵
三等者各爲表傳別功罪爲萬世勸懲又表內
閣以崇政本表太宰以重銓衡紀文武名臣以
垂景範紀遜國諸臣以獎忠義述天文地理以

嚴脩省辨經畧述三禮百官以秩祀典別職掌
考四夷北虜以通正朔飭邊脩俱原本始核事
情于予心若相契者時全書未成期日後彼此
攷訂以竟初志及公任大司寇南歸予猶久掌
邦土無緣質公於鹽官故里迺公忽先予逝矣
又云公褻身澡行不愧屋漏而保釐江淮掃定
倭寇與夫天曹之秉公京營之祛弊邢部之敬
慎俱焯然爲朝紳所景仰較之襲縟辭侈清談
於理道無補者何啻徑庭也

皇甫子安

皇甫子約

前浙江按察僉事皇甫少玄先生濬字子安故
重慶守錄之子也昆弟四人長曰冲仲卽先生
叔曰沆季曰濂皆以科甲文學著聲先生成進
士累官禮部祠祭郎中得其尚書心尚書入相
會置東宮僚屬以先生補右春坊右司直郎兼
翰林檢討甫上而爲言路所訾外謫浮沉久之
始以南刑部郎分臬浙東復坐計吏謫待次里
中鬱鬱不樂病卒先生視其叔氏更飭廉隅然

言相人牛志
而自矜重負氣矻矻不肯下人故宦屢躋不達
其卒也同舍郎蔡子木哭之曰五字沉吟詩品
絕一官憔悴世途難人頗惜之

皇甫濂字子約孝弟嘉靖進士任工部都水主
事尋謫外歷興化府同知奏計便道歸遂不復
出游心墳典多所撰述晚玩心神明有吐納延
化術未幾卒

王道思

王公名慎中字道思晉江人十八舉進士爲禮部主事累遷吏部驗封郎中謫爲常州通判再擢按察僉事視山東學累遷河南左叅政罷歸初年詩格艷麗雖寡天造良極人工歸田以後又當別議其長技當在序記銘贊諸文其與唐昆陵並軫中原一時大噪人耳良亦非偶有全集又有摘集俱行於世

蔡子木

公名汝楠字子木年十八舉進士授行人與燕
張言河南高叔嗣毘陵唐順之晉江王慎中錢
塘許應元姑蘓黃省曾及皇甫兄弟輩時時以
聲律相高而公之譽問翩翩海內矣已而以便
祿養乞改南得刑部員外郎久之出守歸德歸
德故州也睢陳之間多巨盜稍稍嘯聚切覲非
常者改爲郡而公以才爲郡太守佩二千石印
綬皆出填之下車不數月郡中肅然當是時公

以疆幹聞兩河間未幾以母憂歸歸築一室於
前山之麓且耻賢豪士不當以五言終身也於
是下帷讀三代以來孔孟莊烈荀揚下及騷選
釋老列仙百家之書而最注心者古六經今所
刻諸經札記是也服闋補衡州衡僻楚之南服
故多廢而公則撤去故守歸德時幹局稍稍以
經術醞釀之不務聲名惟以廉白長厚持大體
民甚德之朔望數進父老於其庭與之揖讓問
民疾苦復飭石鼓書院與諸生弦誦其中歷遷

至都察院副都御史撫河南召爲兵部侍郎典

戎政嘉靖壬戌會虜犯京邑天子稍厭司馬

以下會公從諸公卿祝釐西齋宮上從帷中

望見公貌寢出公爲南工部侍郎尋卒于官予

嘗按公學凡三變而其泄官持政亦數與學相

上下初釋褐時競爲聲詩然鑱刻藻麗過南省

則洗去沿華合響郎劉諸大家矣歸德以後稍

稍進經術然所至猶不能不以才指相高守衡

州則寢寢近古循吏矣已而由戎政來歸又若

言木ノ物云々
冷然萬物之外而世之升沉顯晦不以侵鬪其
心者殆庶幾乎古之有道者所著六經札記而
下別有自知集樞筦集白石文集八十卷

閔師望

雷必進

閔公名如霖字師望烏程人莊懿從孫嘉靖壬辰進士選庶吉士授編修尋轉諭德奉 敕纂脩會典繼掌國子監嚴身率物不苛細六館之士至今德之壬子以禮部侍郎兼學士主教庶吉士與多士商論 國家大故使知輔養所急尋改吏部掌詹事府丙辰陞南京禮部尚書霖寬大優瞻三典文衡一主武舉較閱精審咸稱得人歷官清華應制敏捷心虛神朗遇事能斷

贈太子少保

雷公名禮字必進江西豐城人嘉靖壬辰進士
任吏部考功司主事歷浙江提學副使官至少
傅太子太傅工部尚書宦履所至皆有聲稱且
留心經世頗多著述

俞汝成

公名憲字汝成號是堂直隸無錫人也嘉靖壬辰進士官至臬憲有集若干卷爲詞林所賞公生平精力在盛明百家詩一書計百卷搜剔既勤詮擇多當其自序有曰盛明百家詩予自嘉靖癸亥迄於丙寅始克彙次其集蓋盡平生所藏又四歷寒暑乃得詩一百六十餘家共詩賦詞一萬七千六百首有奇存之家塾用詔來裔且以備老景吟諷之資云爾壹不敢示諸人人

顧當好文之世士多傳說稱誦至有携楮墨固求印刷者或又以重費相購請予不敢當益爲秘藏如在深山石室中也獨念海寓至廣作者日多近承集刻見投或繕所傳示朝夕勤使不遠千里而來若過讓不遑其謂我何且窮探滄海尚有遺珠未經屠門詎稱大嚼是猶闕武庫者未盡其甲兵入寶山者自限于撚耳也坐是不能自安益加搜訪昔予有云倘歲月苟延當爲增刻一編俾成全書不然終爲闕典益重

區之過矣是雖酣後贅言不可忘也爰自嘉靖
丙寅迄今隆慶辛未又六經寒暑再得詩百七
十餘家共詩詞賦萬餘首通前四十九冊竝前
後目錄一冊共成百數庶幾海內興文之士一
覽可盡雖不免遺珠之詆似亦可供大嚼之歡
矣

孔汝錫

許子春

包元達

孔公名天胤字汝錫又號管涔山人嘉靖壬辰進士第二今籍山西之汾州先聖文宣王裔也詩文俱可傳其與謝茂秦倡和詩尤優于謝蓋謝入晉而江淹才盡孔反掩出其上矣

許臬使者名應元字子春號茗山浙江錢塘人亦嘉靖壬辰進士仕路邐迤久之涉官臬使其畸堂集文大有秦漢人規格詩有唐人風致蓋亦秣林不多得者二公卷帙皆足以傳世不廢

言木ノ生ノ
矣

包節字元達號蒙泉舉嘉靖壬辰進士公孝友
天植忠義性成秉道嫉邪毫髮不假兩使滇閩
再按湖南能令豪右權姦秉跡斂手風裁凜然
會忤奄豎誣以震驚陵寢謫戍莊浪衛者十
有二年聞母弟殞謝哀毀而卒識者惋歎公文
宗西京五七言詩有開元風骨皆窮而益工莫
方伯如忠比之虞卿云所著有包侍御集六卷
苑詩類選三十卷皆行於世

莫子良

公名如忠字子良號中江松江人由進士官至
浙江布政刻有崇蘭館集陸宮保平泉序云公
撰著皆緣本經術博綜群籍檢括名理漸涵蘊
藉尚躰要而發之藻蔚故其文深厚爾雅吁徐
宛委躰裁於廬陵詩則抒寫性情諧合風雅而
緣情躰物敷腴雋永其尤所膾炙于時者五七
言近躰可上方王孟抗行岑劉槩其全躰則本
之閎博之學入深湛之思取材備而發皆應節

若亟治之剗犀動中窾會恢恢乎游作者之域
矣公蓋性尚玄泊簡薄世好而恬於仕進通籍
以來數引疾家卧歛神用以一意著述晚解藩
政歸杜門掃軌游神竹素里邑後進贊所業以
就正公者公提衡其間披衷藁窾片言解頤奉
以指南一時懷鉛之士樞趨景從者視爲龍門
信作者之端表也

王子新

王逢元字子新號吉山祖徽給事中憲廟時以直諫名父肅河南提學副使當弘德間與顧尚書陳太史並握江南文柄子新旣出文獻世家而資性絕穎讀書一目數行下輒能成誦爲文落筆不凡詩宗少陵書法蘭亭聖教十七帖智永皆入妙品金陵書家至子新最著海內齋金裘幣求之者接踵於道而子新不屑也人因甫原公之善書遂以大令呼子新又因子新家之

代有文人也乃益知王謝至今不衰云其於畫
家宗旨自王摩詰至趙松雪刻意倣之用筆着
色極其精工而古雅之趣尤不易得子新門閥
既高人品復自殊絕以故俯視一世不樂仕進
縱情花月之間壽亦不永至五十三而卒惜哉

許仲貽

金子有

公名穀上元人字仲貽嘉靖乙酉舉于鄉乙未
會試第一初仕計部改儀部轉天曹郎以文選
遷南太常少卿尋謫浙江運副起爲江西提學
僉事仍遷南尚寶卿放歸家居高壽登臨詩酒
克然樂也其詩溫厚坦易無淺刻苦澁之態同
時有金子有者亦南京江寧人名大車自號方
山子弱齡業舉子卽能作奇語乙酉舉於鄉屢
試南宮不第栖栖青袍竟以旅卒時年四十四

歲無子少與許仲貽謝應午陳羽伯讀書清溪
之上才氣豪宕綽有時名

孫文恪

公名陞字志高號季泉少嘗作越王臺弔古文
見者奇之嘉靖乙酉領鄉薦乙未對大廷進
仁禮之說賜第一甲第二人授翰林編脩忠
烈公炳然樹大節而公與伯兄又以文武科相
繼魁天下凡稱世家未有過焉者也乙巳以校
勘列聖御文五經二十一史遷右春坊右中
允與修大明會典清理軍職貼黃丙午主南
畿試稱爲得人己酉遷國子祭酒其教先器識

抑浮競爲格二十二條懸之屏間不以親貴關
說有所左右諸士咸服辛亥遷禮部右侍郎尚
書事必咨公以決其大者若 裕景府冠讀禮
是也壬子 世宗卽舊邸建元佑宮成以爲
二聖重地安神重禮選於諸卿佐 命公奉勅
以行有司聞公至治厨傳甚具公一麾去不受
襄鄧間方役民治河公軫其寒饑作詩遺守臣
諸役者遂得廩於其吏癸丑改吏部丁楊夫人
憂服除薦䟽踵至徵拜禮部左侍郎未幾仍改

吏部遷南京禮部尚書陳較術業數事 詔嘉
納之自近年來仕者謂留都爲遠外每當徃輒
不樂公之南也獨自請以行士大夫愈服公之
高冀旦夕入相獲觀其所設施而竟不及召以
卒公自少嗜書其在翰林終日手一編絕不與
他曹事及旣顯猶然爲文宗兩漢詩宗杜氏所
著述凡若干卷與官諭華州王君友善

趙文肅

趙公名貞吉字孟靜號大洲四川內江人也嘉靖乙未進士改庶吉士歷太子諭德官至禮部尚書武英殿大學士公生平問學及相業之大堵已僞在 國史及家乘中矣不遑複述惟是庚戌虜變余方離襁隨家大夫官北都目擊其難稍長而家大夫述公定難之功今畧記之庚戌八月北虜犯闕京師戒嚴勢甚危急集百官會議未定公時爲國子監司業抗聲曰今朝廷

所急者出沈束於獄申理周尚文之功虜易退耳時上遣中使密窺會議諸臣聞公言宣入左順門令手䟽便宜以上公因請急遣近侍有才猷辦博官一員同錦衣衛官詣諸將營中賞軍激勵士氣仍許開損軍之令令將士義勇軍民人等人自爲戰但得一首級者賞銀百兩逗遛觀望不戰者誅無赦上覽奏卽陞公左春坊左諭德兼河南道監察御史給賞功銀五萬兩令其隨宜區處宣諭將士及虜退降公廣西

藩漢鼎典史以出城勞軍還復命困言臣以
宣明詔懸布賞格勸大將軍鸞以乘雨罷虜
仍傳諭城東西南防護諸營獨宣府總兵趙國
忠兵在沙河迤北臣未經辭朝不敢遠去

上曰貞吉奉勅宣諭各營所領銀兩未有處分
如何卽云復命且妄以未經辭朝爲言顯屬欺
誑其速送錦衣衛鞫實以聞已而錦衣衛奏狀
得旨貞吉沽名欺上實非真忠且言周尚文
功未報沈束未放及至委用却乃畏縮敢肆誑

君代人懷怨姑杖五十降邊方雜職用初公廷議罷盛氣謁大學士嚴嵩於西苑直中嵩辭不見公怒叱門者會通政趙文華趨入顧謂公曰公休矣天下事當徐議之公愈怒罵曰汝權門犬何知天下事嵩聞大恨乃佯薦公使出城賚銀勞軍時虜騎與諸軍分屯城外者相去各數里公僦民車致銀仇鸞所鸞不受虜且漸引去公計無所出恐後時乃賞勅巡城外徧諭諸營而還比且復命遂得罪嗚呼當此衆心皇皇之

時能扼腕危言顛沛而不悔其氣誠足壯矣所
著作多侃侃之論大都類其人云

劉子素

劉玄子

公名繪字子素號嵩陽河南光山人也博學宏詞余邑相去不三百里而遙素嚮徃之無從得見其全集止見李太史評語云劉子素雄豪自喜不拘細故紬書旣多著述亦易嘗爲玄湖諸賦學楚人詞亦云過奇矣今止取其玄湖賦燕臺賦孤鶴賦龍舟賦陽春賦荅楊升菴書上座主潘尚書竺翁書荅李太常中麓書荅高學士中玄書詩亦纖弱不副其人氣魄豈才長者固

恒有此耶有子黃裳翩翩軒舉無隕家轂也

王懋中

王立道字懋中無錫人嘉靖乙未進士選翰林庶吉士是歲上躬御文華殿授簡命題校第諸進士乃得選者三十人而關中王維翰在其時李文康公在內閣月試吉士凡兩而顧文康公典教書李公文尚溫夷爾雅詩婉切乃立道文卽溫夷爾雅詩婉切造券合一試輒冠諸人由此名顯其後立道授編脩禎亦爲檢討立道于是卜僻遠居盡括古墳籍刺取之今事大

者皆牒記客時過其門每見其下捷也日坐一小樓連數旬不下卽宗黨造者莫覩其面則耽嗜讀書其天性也居無何病肺欲䟽歸立道號堯衢改海樵語曰脫吾疾瘳以請而得走錫山也將腰斧伐林於海之側群樵人倘佯足終吾季吾誓與雲霄冠珮絕矣䟽上未報而卒年三十八父曰九巖以禮部郎中自免家居立道在京師遇一果一肉之珍不輒食必函致九巖公爲書訊其親必盥手焚香乃始書書就含涕

至不勝其孝如此與人交雖簡嘿艱合然心從
忠厚得一善必揚之人過則口悛悛不忍道一
詞也是皆足不死乃顧歿天道誠遠哉立道美
髭髯垂幾乃臍貌癯而骨清日者咸指爲奇將
穹致顯融綿綿久也今若此則人相石室之篇
誣耶

尹崇基

薛仲常

洞山尹公名臺字崇基江西永新人中嘉靖乙未進士由翰林吉士歷官南京禮部尚書有思補軒集毛司馬東塘嘗推其詩莊重典雅

薛仲常武進人名應旂號方山嘉靖甲午舉南畿乙未會試第二官至陝西兵備副使負氣節能文章以高第夙望督學浙中廼亦坐不稱改職尋復放歸假令爲他官其不容於時又可知矣予故讀其集而增慨焉

趙平叔

公諱峻字平叔歸安人也公幼峯寄遇事敢任
祖壘爲豪侵以諸生而力復之比舉於鄉卒業
南雍有鄒夢鶴註誤當司以其父總制三邊故
置于法後莫敢出公每痛其莫之反也比乙未
成進士授南京刑部廣西司主事遷至郎中以
曉暢典刑而掌封事科尚書聞莊簡公凡難事
務平亭公剛毅自持當堅決莫敢撓京兆叅軍
鄧鶚托城社而墨久矣人謂不可問公竟致于

法于鄒夢鶴則復平反之既不畏強禦又不避
嫌如此凡議有不合卽欲投劾去上官第陽煦
之而僚輩因將甘心矣且性少愛默好聲詩每
謂詩至唐亦千古之良也至于明經興則固失
之千里乃間有爲之亦惟資之所近焉耳其於
格調體裁邈哉未之講在僚輩間儼然以詩自
重或不中程度直以意彈射之復不能容人短
長喜面折而多不堪其出青州蓋麾之矣不至
顛擠憾未釋也公歸不與公事視里中閭閻

邑屋而不爲屈間至郡閣與會當座而短長
不屑與之往返莫不憚其莊城居樓如斗典籍
敦彛甚具署之曰甲秀非莫逆不與登城外峴
山浮玉諸勝余輩則嘗從之游其別業秀而野
環城之鉅麗者皆不及其雅致每引詞客對酒
多與逢掖隱淪亢禮引上座初肅入戶輒手所
作而揖曰幸爲不佞彈射客有請者亦然彈射
訖乃飲或自歌其詩而輒酣呼逾快也蓋庶幾
乎嵇阮之風矣公昔夢有絜之者言其不滿六

尺而每咲曰吾其不杖於鄉乎生平無他病病而強半爲醒耳至病革矣家人治木而竊潔之公覺而歎天年終矣卒于辛酉夏五月之閏有連川集行於世

張子成

張蒙訓字子成別號惇物山人關中耀州人也
先生詩文集各一卷蓋觀察喬三石先生所選
其子太僕君思綿刻之以傳者也先生乃戶部
左侍郎張公璉第四子嘉靖甲午以春秋魁省
試乃後就官襄陽教諭遂卒于襄陽卒未幾有
昌黎知縣之命云往三石先生談三秦文物輒
亟稱曹士奇與張子成爲關中二才曹評稅構
詞精挾神髓每一撰出作者皆廢顧必不示人

稿竟淪逸獨子成集以觀察父子得傳斯文固
有幸不幸哉先生詩古躰本漢魏近躰與王孟
竝稱然類浩然尤甚間亦有類太白者冲逸清
遠盡湔浣綺麗而超風塵之表其文辭古朴渾
雅馳軌史漢卽如其所爲詩也先生之學無所
不闕然于王孟詩史記兩漢書顧尤篤好不釋
卷此其生平嘉尚者固有所合之也與近世徒
剽敎糟粕而猥云擬古不同日而語矣

陳羽伯

陳鳳字羽伯應天人也其履歷載家乘中茲不具論刻有楊升菴批點陳玉泉詩選馮少洲評曰五言古體初啟唐人肩鑰後入晉魏閫奧七言歌行豪逸雄俊真得盛唐三昧固已迥絕流調矣五七言近體雅秀清暢王孟之流也惟五言絕少傷平淡古人云字少意多薄有讓焉楊升庵書曰承寄示清華堂摘存稿連日手之不釋其諸體之分信如馮子之評走所深致者學

古而不蹈襲以矯近日之敝良是嘗慨近日一二學古者規規杜子美不學其意而襲其句是少陵之盜臣也少陵稱太白詩爲清新俊逸豈曰規規蹈襲哉文章如日月朝夕常見而光景常新茲讀佳什有印鄙見矣敢僭及之

黎惟敬

歐楨伯

瑤石黎君諱民表字惟敬廣東從化人由鄉貢進士任中書舍人擢南京兵部車駕司員外郎性嗜詩篇屢有刻本且善臨池之技其隸書得其師文衡山先生家法大爲宇內人士所重
崙山歐君生於廣東順德官江都訓導名大任字楨伯二公咸與嘉靖間六子遊著作頗多已有定評歐公青衣李英詩甚穩妥亦有小集惜逸其半

駱質甫

浙之武康有駱公文盛字質甫號兩溪中嘉靖
乙未進士選翰林吉士爲編脩官時年已四十
矣一時同館之士多重其文無何乞病還溪間
期滿不復赴有移書勸之起者終謝不起溪居
惟詩酒自娛而已其用意深遠蓋有托而逃者
蔡白石稱公詩冲澹爾雅摘詞整秀出唐孟貞
曜之上孫文恪稱其爲文簡古多思尤深於詩
婉切冲雅似唐人聲調有遺稿十二卷襍談二

言ノ外ニ

卷

王允寧

王維禎字允寧陝西華州人舉進士改翰林庶
吉士授編脩歷官至南京國子祭酒便道過家
會關中大震殞于家維禎性亢急於世少所推
讓獨與餘姚孫陞游陞者與維禎舉進士爲史
官日聚著作退朝輒相與就舍持文墨議論終
夜不輟以爲常有故則走豎子挾筴進之務相
攻錯瑕瑜不掩以是二人甚油油然久相好也
維禎爲文法司馬子長詩法漢魏近躰法盛唐

尤宗杜氏居常好深沉之思務引于繩墨必結
構中度而后修辭否則歷月經歲筆不直下也
維禎歿陞官禮部尚書爲之哀次得詩文若干
卷曰存笥稿刊于闕中再刻于蘇州陞敘之曰
余觀作者之林其長短較異卽能屬書摘辭而
聲詩不振抑或以近躰取重古躰絀焉尺有所
短寸有所長非虛語也獨空同先生得其具躰
王子與之後先入室皆得擅場卽闕中多才賢
此兩人者豈易得哉王子旣博學強識與之抵

掌論事四方疾苦九邊要害又可坐而策之曾
不得終其夫年功用未起命也所著有王氏存
寄稿又有續稿並行於世

李子升

李公遷字子升別號蟠峰豫章人也由進士官
至南京刑部尚書宦績甚著詳弇州先生神道
碑中公於古人好稱諸葛孔明裴中立韓稚圭
司馬君實劉器之於前輩稱劉伯溫王伯安其
以政事行術居師友間者韓恭簡宋莊靖熊恭
肅楊襄毅楊忠愍及鄭端簡曉也早歲窮理性
之學然不欲有其名時華亭相公爲領袖貫魚
而進者不可勝數公益秘之曰學以明道也而

以干進得無愧業舉子者乎公所爲詩及文不甚多然往往清暢古雅有漢唐人風氣尤工八法人得其一赫蹏輒寶藏之所著有詩文集續集十一卷遺集一卷摘稿二卷皇華錄一卷京畿奏議四卷兩廣奏議八卷濟南議稿二卷郢曲同聲楚越吟稿西輶集祗役襍言各一卷脩邊雜考三卷國朝故二卷皇華便省錄清音競秀錄星槎萬里錄官中紀事各一卷行于世者半胡直序公鶯谷山房集云古詩遍謝近軀出

入岑劉文則取材漢宋間然皆發諸肺腸語不
屑銖寸之合而首中於金石之會至其澹足雍
容雕琢靡事又庶幾彭澤之從容矣

王子裕

先生常之無錫人名問字子裕學者稱爲仲山
先生先生正德己卯舉於鄉壬辰舉禮部不樂
仕謁歸六年登戊戌進士第授戶部湖廣司主
事出監稅徐州尋以母憂起念父樂莘公春秋
高䟽改南職方主事便養而樂莘公雅不欲行
先生則承命爲繪扇三十握握書一詩曰月日
一易之如吾日侍也已歷陞車駕司郎中尋擢
廣東按察司僉事瀕行過省樂莘公於家樂莘

公亦念先生遠愴然有決色先生大悲而自循其裾歎曰吾終不能爲溫太真行至桐江賦詩十二詠以見志遂投劾而歸比歸則旦暮侍樂莘公逆意奉向公左右顧無不得所欲者撫幼弟幼妹如已出曰無以此遺翁百歲後憂諸所怡事樂莘公皆此類比公及先生遂不復有仕進志退居湖上迄三十年足跡不一至城府部使者前後䟽薦之不起海內大夫士過必造門求識王仲山先生先生則署其門曰疾謹謝

嘗書數語於屏曰訓我以道德者吾拜而師之
授我以文章者吾敬而受之貽我以清言者吾
洗耳聽之求我以詩益者吾量已以應之告我
以家事者吾旣有人以任之語及時事者吾厭
聞之語及公府事者隱几不應絕之晚季構亭
湖濱寶界山環植竹木華卉䟽流泉立奇石其
間時時焚名香手周易一卷擁膝兀坐興至則
爲詩文或行草書數紙或又時時引紙濡筆和
黛墨點染山水人物花鳥先生于詩于文于書

若畫皆佇興而發不務刻削規矩前人譬之入
水汨游赤手奮攫以舟爲馬脩然翰墨蹊徑之
外人稱先生詩類韋蘇州書類米芾又類黃涪
翁蓋神理所至懸合古法實未嘗斤斤效也先
生行既高海內大夫士望之如神龍不可玩狎
則爭購其詩若畫寶藏之於是先生遂以隱操
名天下然先生故負用世才歷官所至聲輒隆
隆起督稅徐州以法裁耗羨米十二三吏胥斗
攢咸膠手不得籍氣勢爲奸會 獻后梓宮下

洲道淮泗吏執事往返動至旬月先生先期
督漕舟過徐倉猝指麾若無事者留都額設馬
快舡七百八十餘艘歲役卒修造至四千餘人
謂之幫甲幫甲費不貲貧軍坐累轉徙無告有
自殺者時先生在南兵部發憤白大司馬宋公
曰今縣官不惜數千人之命而惜數千金乎出
疏袖中請官自出年例銀督造議上 報允留
都至今便之卒營地舊與齊民錯豪勢盤據且
百餘年先生念法之必多巧匿爲避罪計乃具

言木ノ外ニ
爲令縱諸豪自出白而佃之官不奪其業營地
遂清會有 詔覈武職緣濫先生按籍爲立決
去留權貴人請謁噤弗行時北虜歲入盜邊先
生預籍武健士以應募人厚其餼比罷歸貲故
有餘或請追之先生悉縱遣去曰人則弗靳其
死而靳之餼耶一日縣官復下尺檄誰復至者
有督撫某檄借先生所籍仕以應募歸則悉追
之先生嘆曰是可與議大事哉後卒以僨事戮
中貴人某守脩畱都驕甚嘗私抵先生乞餘軍

供洒掃實利其資先生執不可乃止于是當事者人人稱王郎中才守遑厲倫輩業且竟大用矣騏驥方發軔時以父子臨岐一言攬涕却行烏乎其仁哉今鄉人傳稽勲君侍先生寶界山中先生義不忍令壯子相隨退隱月月命稽勲君出稽勲君重失先生指則月月裝行故爲事失期而間要諸故人緩頰至先生前謝先生亦重念前桐江投効事哀而許焉烏乎使天下父子聞王氏之風其可歎也矣先生經學甚邃尤

自謂有得於中庸嘗作圖說以授學者學者負笈從之人人得聞所不聞故所成就多知名士其歿也門人私謚爲文靜先生所著有仲山詩選祗役稿原筮齋集崇文館稿若干卷藏於家

喻中甫

喻公名時字中甫號吳臯河南光山人也公之
成進士也則首拜吳江令吳江巖邑戶口財賦
甲天下吏緣是得乾沒爲姦隱賦賄出入若大
崔苻然而公至則嚴句校具得其狀始爲絜法
提衡之秋夏稅以限上母事敲朴力役以則應
以時至母待號召鄉小民闢閱母復之三老就
公片語立決大者笞十餘斥遣之各自得意去
臺郡國下訊牒及它利害關白鏑一大櫃中手

自封發吏亡問不得事也卽不敢望得公一噸
咲以少見指而鄉小民亦不復知有吏公不爲
操切假惠文彈壓間右時時有所効治皆取大
猾尤者吏及大猾惴惴戴三尺而立然竟公任
亡敗墨吏卽御史行部吳江亦不問吏及大猾
指名無事刺促令代我治之矣大江而南四郡
一州十五邑亡論遠近稱喻青天喻青天竟用
治行第一徵拜御史前是太保王肅敏公廷相
見公文而善之意不欲公外補公辭曰必不

也謹當外者王公奇其言而疑其不讎後乃心
服公爲御史屬虜欲求貢或謂虜狡給我且事
軀大勿許便公䟽曰毋爾也虜以虛給我而我
遽絕之是授彼名也虜以實輸我而我逆拒之
是創彼心也我且又代負夫不爲彼先不爲彼
後內固吾守而外探其幾此在一才邊吏任耳
公又條脩虜十四事上之咸報聞相嚴者初得
幸上有墨聲公抗䟽論列謂其人險而獯久之
且亂天下業已上卽素服候訊北闕上心動

公言而難去嚴爲兩已弗究公遂出視鹺政河東屬歲旱公禱雨旱弗利民而當饒得鹺或強公毋禱公曰不可利國等耳吾不忍以吾職易吾民竟雨立澍應歲大稔而鹺額亦不虧相嚴日益貴用事公乃移疾歸會其母李老病卒毀瘠踰禮服除彷徨久之相嚴內攝公中州名士行能高未有以中而部檄公強起出按蜀亦自勵有風稜汚吏望風解印綬去蜀以大治還長其道事尋遷應天丞轉太僕俄以右僉都御史

督西轅六郡公日夜拊循其吏民練兵實邊
拒險虜騎入犯距浮圖峪十里覘我師整而和
遂巡引去亡何改督操江佐南臺數上疏陳便
宜計擒大盜汪然朱良弼等振武營兵驕再倡
亂公奪其謀進右副都御史督漕運公故嘗爲
令屬江南運爲四議以請其大指約束長賦者
毋私允畱減存料銀添給運卒行糧改徵脚直
詔可仍著爲令公益精勤於職爬搔垢弊殆
盡藉羨餘金萬計入之朝時人爲謠曰夔夔鼓

下長淮真若翁青天來俄用言官薦進督陝西
三邊軍務公至則獎率將士出邊鹵首虜百餘
馬駝牛羊稱是虜吉能賓兔台吉入寇公合三
鎮兵徼破之獲首虜五百餘又以延綏兵搗虜
獲百餘級三上捷賚白金文綺進食二品奉父
之拜兵部右侍郎協理戎政應 詔上八事所
陳嚴補替禁奸詭定編派於其政尤切虜入寇
京城公佐大帥鎮遠侯營於郭虜不敢越而南
手詔慰勞賜玉食法酒尋出爲南兵部時大

司馬病在告而公攝武選軍政進其屬矢天諭
之一時翕然稱明考績至家有嫉公者中以浮
言候別用公歸可三歲所而薦疏騰上召爲南
戶部侍郎督畱儲業已病矣強起其職條上四
事曰明注選重部運省解納分水兌 詔次第
行之公竟以不勝劇卒年六十五公爲諸生所
構撰經義策論傳人人且用是魁其省後好爲
古文辭源出盤庚周禮追琢詰屈世所謂喻氏
學者也

茅邦獻

吳峻伯

茅公名瓚字邦獻錢塘人嘉靖戊戌進士第一授脩撰歷吏部左侍郎翰林院學士公頗嶽嶽自負所著有見滄文集四冊蓋非苟作者其於舉子義尤畱意於策場另著爲書云士子多傳誦之

吳公名維嶽字峻伯孝豐人弱冠以禮魁浙嘉靖戊戌登進士授江陰令轉刑部主事同考會試所舉得名士歷山東提學副使齊魯之士蘇

馬改觀陞右僉都御史巡撫貴州平巨酋諸夷
畏服尋改南遂歸嶽家世稱雄顧折節恭儉性
直諒尚氣節好古篤學爲時所稱之所著有詩
若干卷

陸子傳

陸先生諱師道字子傳蘇之長洲人始成進士
所射策入故相夏文愍公言手大奇先生爲言
於故相李文康公時曰是子也其文賈董而書
則鐘王以第一人聞是時上不盡寄相臣柄
移之二甲第五選而得工部都水司主事任職
絜廉無害夏公內自恨奏改先生禮部儀制司
供事制勅先生雅不欲近相臣而念越人勇之
說進所取應制酬代漸詭因母陳宜人病請急

歸侍久之陳宜人病漸劇會所予告過期遂不肯出益肆力於學其學自九流七畧裨官黃衣之屬亡所不窺手抄典籍後先積數百千卷丹鉛儼然益工歌詩及古文辭又益習書小楷以至古隸皆精絕又傍晚繪事簡淡咄咄逼倪元鎮時文待詔先生徵明者里居而亦善詩及書及繪事先生造門用師禮禮之人謂先生業已貴胡折節乃爾且不聞世以秬目文先生耶先生曰子言之誤夫文先生以秬藏道者也自吾

與文先生無適而非師也者奉之益篤文先生
亦篤好先生卽膠漆莫喻也諸臺使慰薦先生
者無慮數十疏自世宗朝執政者好援其黨據
津要以相翼毗而輕於棄名士大夫而士大夫
亦醜之莫肯爲用而吾吳最盛前先生者有王
參議庭陸給事榮袞事袞皆里居與先生善
而先生所取友如王太學寵彭徵士年張先輩
鳳翼兄弟多往來文先生家與文先生之子博
士彭司諭嘉日相從評騭文事攷校金石三倉

鴻都之學與丹青理茗盃鑪香條然竟日間從
諸賢出遊汎石湖取越來道放舟胥口尋覽虎
丘上方支硎天池玄墓靈巖鄧尉萬笏大石之
勝吳中好事人操酒船跡之於山水間先生亦
無所拒取酣適而別興到弄筆得薄蹠阿錫一
點染若重寶蓋是時海內懸格以購文先生跡
次及先生先生不爲意尋而陳宜人以老壽終
先生哭毀幾滅性而素所友愛弟安道亦卒以
是日邑鬱忽中風厥憤憤嘔沫久之漸愈而性

理亦少錯矣先生林下踰二十年執政者新以
名起先生乃起就補南儀部 召爲膳部郎中
甫 上擢尚寶少卿尋奉使祭秦先王公殊自
快以生平所慕者關中形勝今幸一寓目焉乃
縱遊二華觀龍門砥柱浴驪山溫泉弔漢唐諸
陵所至皆有詩而秦之嗣王習聞先生名厚幣
以饗先生謝弗納歸署尚寶篆亡何故病復作
乃再上疏予告歸歸六年卒先生初號元洲尋
更曰五湖以表寓也卒之年六十四所著文集

左史子漢錦若干卷

喬景叔

三石先生喬公耀州人也諱世寧字景叔公生有異稟日能記數百千言又強學不倦雖至老未嘗一日不學問古詩法漢魏近體法唐文法秦漢融貫於古自朔筌矧一時作者歛紳嘆服咸稱不及遂卓然爲名家今所傳丘隅集是手自芟裁者也初公在諸生督學使秦公文何公景明唐公龍皆目爲國士嘉靖乙酉舉于鄉果第一戊戌諸進士對制獨公文剴切粹美業已

眞進士選首會唐公爲司寇與讀卷見文詞大類公於是間語諸同事語稍泄執政意思遂不以選首進廼出身得授南京戶部主事凡再擢至郎中搢紳學士若馬公汝驥崔公銑莫不交好於公許公棧孟公淮皆自以友而師公各枕經籍書求通其願未幾公擢四川僉事分按川南地川南控引越雋牂牁諸戎號難治公盡取故牘察事所緩急重輕卽連引數十年悉酌以法理決遣罷之時時巡行郡縣獎吏民之良與

罰其怙惡者公素彊執不阿比執政者欲公敘其文因蜀之寮案致言於公公置之不爲理有蒲人告嘉州人不償貸州笞之死仇蒲人者謂蒲人毆之死信于御史公爲白其冤瀘人黃蒿豪猾官府不能制捕得之御史欲重諸法公以數問訊無左驗罪止徙蒿得不死諸所平反多類是於是川以南無冤民公爲湖廣督學使湖地綿邈公試士歲必遍囿所遺逸士所擢拔無愧顏其所厭抑無紕辭人人爭自濯勵文教大

興公又敦本樹標因質成善湖之士莫不以名檢德行相爲引重故士之以文藝舉以才誼著者一一皆公所滋植故今雖去楚幾所年士人感奮不啻一日謂善教之得人心者非耶歲庚戌虜犯京師上遣近臣募兵河南議緒紛拏公適以參政蒞任獨選丁男壯者從軍裁損供費後諸應募惡少多道亡且鹵掠獨公大梁部署兵全無不法者尋督餉小灘小灘故監允於主事第主事多聽商賈閉糴計使轉餉者無

階轉官因翔其值得倚藉爲利公令轉餉者分
糴旁近邑奪商賈利而坐失主事陰所操縱民
便之河南至今遵爲成法公又有田賦議宗室
議皆 國家大計惜不能盡行云公自河南擢
四川按察使以憂歸公在官十五年歸十年自
讀書外絕無嗜好聯親戚同姓以恩義周其窘
乏敬老撫孤嘗作糾宗碑族譜急鄉里之患不
責其報關中士大夫勸公起官公不應司馬楊
公博中丞殷公學御史崔公棟李公秋交疏薦

言木ノ外ノ一 卷ノ
之竟不肯起嗚呼世所談文章士不閑經濟公
行足世師鬱爲儒宗纂英藝林視文章特一技
其所建造率鑿鑿副名實抱奇不售自斲其用
廼後人咸克世家業雖不當世後必有達乃其
所歎

皇明詞林人物考卷之八終